

四庫全書

史部

欽定四庫全書

史部

隆平集卷八

五至

詳校官編修臣李潢

編修臣裴謙覆勘

總校官檢討臣

何思鈞

校對官學正臣

翁樹棠

謄錄監生臣

朱上林

欽定四庫全書

隆平集卷五

宋 曾鞏 撰

宰臣

王曾字孝先青州益都人咸平中登進士甲科所試有物
混成賦天下以為賦格累擢知制誥翰林學士大中祥符
九年叅知政事時王欽若方挾祥瑞迎合人主意陰排異
已者以細故罷曾政事天禧中復叅知政事魚太子賓客仁

宗即位以為宰相忤太后意罷知青州景祐二年復相封沂國公與呂夷簡議論不協求退出判鄆州加資政殿大學士卒年六十贈侍中謚文正有文集五十卷子緯幼以姪繹為後景祐初契丹始修好所致書以南北朝冠國號之上曾時直史館言春秋外夷狄爵不過子今與抗非外夷狄之意上嘉之天書降詔作玉清昭應宮廷臣莫有言者曾陳五害以諫在翰林一日上晚坐承明殿召對命謁者諭之曰思卿甚故不及御朝服為上所敬如此知審刑院初違制之法無

故失率坐徒二年曾請分故失非親被制書者止以失
論上不悅曰如是無復有違制者曾曰如陛下言亦無
復有失者矣自是違制遂分故失天禧初知應天府民
訛言有妖若飛帽搏人自京以南皆驚恐曾夜開里門
捕倡言者民乃定真宗晏駕丁謂欲皇太后對近臣決
政事皇帝獨朔望見羣臣庶務悉令入內押班雷允恭
畫可於禁中曾曰兩宮異處柄歸宦者禍端兆矣乃奏
請如東漢舊制太后坐右垂簾同聽政焉真宗不豫有

引漢唐事諷太后稱制者曾密語后戚錢惟演曰今太子決政資善堂天下固已屬望可異議耶惟演悟不敢異議丁謂坐雷允恭改皇堂事叅知政事任中正言於上曰謂被先帝顧託請如律議功曾曰謂不忠無足議者於是謂貶崖州中正而下十數人隨亦廢黜是時中外洶洶曾正色立朝姦邪憚焉前後輔政十年處天下事審而中理性儉素居家人不見其喜愠之色入朝盛服進止如有尺寸士大夫服其清修莫敢干以私者與

王旦同謚世皆謂之賢相

李迪字復古濮州人少從柳開學為古文開謂門人張景高弁曰此公輔器也景德二年登進士甲科累擢知制誥翰林學士天禧元年叅知政事東宮建兼太子賓客寇準罷相上欲用之迪固辭一日對資福殿皇太子出拜上前曰蒙以賓客為宰相上顧迪曰復何辭耶先丁謂拜相而以丁謂為昭文館大學士位迪上帝不豫令皇太子總軍國事丁謂獨請皇太后止決常務他皆

聽旨迪爭不勝謂益擅權至除吏不以聞迪語同列曰
迪起布衣至宰相能取容徇權臣耶時詔二府並進秩
兼東宮官乃遷迪中書侍郎兼尚書左丞故事宰相無
作左丞者謂欲以抑迪也又欲進所善林特樞密副使
兼賓客迪執不可因於待漏所大詬之至上前斥謂擅
權不法事且言寇準無罪不當黜因格前制不下出謂
知河南府迪鄆州謂入謝自陳無罪復留及仁宗即位
貶迪衡州團練使謂使人逼之至自裁不死謂竄迪稍

復及章獻皇后崩乃再相景佑二年范諷以罪貶迪坐
諷姻家出知亳州久之除翰林侍讀學士畱京師奏呂
夷簡結荆王元儼為除門僧惠清守闕鑒義鞠之乃迪
在中書時補降太常卿知密州久之復資政殿大學士
知兗州元昊反乃上章請臨邊除節制判天雄軍康定
元年請老以太子太傅致仕卒年七十七贈司空謚文
定賜御篆碑額曰遺直之碑子東之徽之輔之初迪在
翰林時薦饑三司調用不給上召迪問迪對曰祖宗置

內藏庫欲攻取西北且備凶年今邊無他費以佐國用
則民不加賦上為大發內庫金繒賜三司知秦州曹瑋
數言唘厮羅欲內寇請益兵不遣乃求罷上問誰可代
之迪曰非瑋莫能制也陛下重發兵得非將上玉皇聖
號耶上因問陝西兵數對曰臣向在本道以方寸小策
記兵及糧以備調發今猶置佩囊中上令探取之目小
黃門取紙札迪悉上合存留及調塞下數上曰不意頗
牧復在吾禁中矣未幾唘厮羅寇邊復召問對曰瑋必

克後數日捷報至上曰卿何料之審也曰彼舉兵遠來此堅壁待之是以知其必勝爾垂簾日廸知河南許朝見章獻太后謂廸曰卿不欲吾與國事吾今保養天子至此何如廸曰不知太后有聖德也后喜

張知白字用晦滄州人端拱二年登進士第累遷龍圖閣待制御史中丞大中祥符九年叅知政事天禧二年罷為侍讀學士知大名府真宗賦詩餞之仁宗即位召為樞密副使天聖三年拜相六年薨於位贈太傅中書

令謚文節無子景德初周伯星見百官稱賀知白獨以
為人君當修德以應天星之見伏何所繫焉因極陳治
道之要又以朝廷重內官輕外官引唐李嶠議請選臺
閣分典藩郡仍自請補外真宗以知白居侍從不許及
固請乃以知青州初知白叅知政事為宰相王欽若所
排及知南京欽若謫分司南京衆謂必報之而知白待
之加厚其在相位清約如寒士慎重名器人服其公

呂夷簡字坦夫壽州人曾祖夢奇後唐為工部侍郎咸

平三年夷簡登進士第累擢知制誥龍圖閣直學士仁
宗即位除叅知政事天聖六年拜相明道二年罷是年
復相景佑二年封申國公四年罷以使相判許州徙天
雄軍未幾復相慶厯元年進封許國公判樞密院以判
院太重改兼樞密使二年以病特進司空平章軍國重
事上憂之翦髭賜以療其疾夷簡薦富弼等數人可太
用因再辭位進司徒固請老以太尉致仕卒年六十六
贈太師中書令謚文靖賜御篆碑額曰懷忠之碑子公

綽公餽公弼公著公孺始王旦嘗謂王曾曰夷簡器識
遠大君其善交之後果與曾並相夷簡通判貝州按河
北水災請除田器之算以重本因詔天下農器皆除算
寇準知永興軍擿巨姦徙湖南過關有上變事者夷簡
曰此必有使之者宜勿問益徙之遠方上從之權知開
封與魯宗道同按雷允恭徙皇堂事真宗既祔廟太后
欲神主復日悉陳其平生服玩夷簡曰太后奉遺以保
嗣君非遠姦進忠愛民欽天未足為報也故事輔臣因

郊恩遷官吏簡與同列豫辭之遂著為式章懿太后上
仙夷簡因奏事簾前曰聞夜中有宮嬪亡者太后即起
有頃獨出謂夷簡曰卿何間我母子也夷簡曰太后他
日不欲保全劉氏乎太后悟乃發喪成服備禮葬之大
內災宮門晨未闢輔臣請對上御拱辰門樓百官拜樓
下夷簡獨不拜上遣問其故曰宮庭有變願一見上上
為舉簾見之章獻皇后崩夷簡手疏請正朝綱塞邪徑
禁貨賂辨佞壬絕女謁踈近習罷力役節冗費既又立

州郡學校授宗室環衛官建睦親宅增教授官置大宗
正以總之郭后廢上欲立民間女陳氏為后夷簡力止
之慶厯初契丹兵壓境夷簡請都大名示親征之意
曰此囊瓦城郢計也於是建北京天聖初太后臨朝內
外無間言夷簡之力為多議者以其再相增契丹歲賜
授宗室環衛官非計之得也

張士遜字順之先化軍人生百日始能啼淳化中登進
士第屢從外補當貢舉初用糊名法士遜試諸科為巡

捕白主司有親戚在進士中願引避不聽因自言真宗是之遂詔自今舉人與試官有親嫌者皆移試別頭後中書擬進江南轉運使闕帝自除士遜大中祥符初詔天下州郡置天慶觀士遜請因諸舊觀以省營造詔如其請久之選為壽春郡王友及儲宮建遷諫議大夫兼右庶子又遷賓客天禧五年樞密副使天聖六年拜相明年罷明道元年復相次年罷寶元元年復相封郢國公七上章請老進鄧國公優拜太傅致仕以宰相謝事

前此所未有也就第十年方卒年八十六贈太師中書
令謚文懿賜御篆神道碑額曰舊德之碑上欲臨奠左
右言其日庚戌本命也上曰朕以師臣夫復何避士遜
七歲喪母養於其姑姑亡徒跣扶柩特追封南安郡太
君陳堯佐罷參知政事有挾怨上言堯佐欲反復有誣
諫官陰附宗室者士遜置二奏上前且言憚言動搖朝
廷若一開姦萌則臣亦不能自保矣上悟置告者於法
誣諫官事亦寢在相位曹利用憑寵自恣而不能正時

謂以為和鼓惡程琳叅知政事多異議孔道輔御史中丞不附已欲併逐之鄭戩發琳市第事士遜諷道輔使營釋之道輔不知其賣已遂言於上上疑以朋黨琳及道輔俱被黜道輔憤惋而死楊偕嘗彈士遜納女口於宮中事所著春坊弊箒等十集子友直友偁友正

王隨字子正河南人咸平五年登進士第累擢知制誥仁宗為皇太子選任右庶子坐假周懷政白金落知制誥改給事中知杭州乾興初復降為秘書少監知通州

久之復給事中遷龍圖閣直學士知戎州戎人多畜逃卒或忤意則執以求賞故坐法衆隨至下令能自歸者免仍隸舊籍多所全活擢御史中丞明道二年叅知政事景佑二年知樞密院事四年與陳堯佐動輒忿爭無大臣體以災異援東漢策免例同請罷除節制判河陽卒年六十七贈中書令謚章惠子鑑錯錡初隨除京西轉運使言父母在洛中乃所部真宗賜詩及羊酒東帶帛使過家為壽時人榮之在西掖不善為制命故出知應

天府外若方嚴而所治常失於寬善佛慕唐裴休為人
仍學其書世謂弗逮也

陳堯佐字希元閬州人父省華國史有傳兄堯叟字唐
夫端拱二年登進士甲科太宗常詢其父省華猶在常
調遂召用之明年父子同日賜緋堯叟累擢樞密直學
士咸平四年同知樞密院事丁父憂起復景德元年改
簽書三年知院事大中祥符五年加平章事樞密使兼
羣牧使七年罷八年復舊官職九年以疾出為右僕射

知河陽疾甚求還至京卒年五十七贈侍中謚文忠有文集三十卷堯叟有材畧多智術久典樞密軍馬之籍皆能記之究心羣牧馬政多立條約公私以為便常為廣西轉運使其俗有疾不服藥唯禱神堯叟以集驗方刻石桂州驛舍是後始有服藥者嶺外少林木井泉堯叟為植木道旁鑿井置停舍至今為利性儉素事親至孝母馮性嚴堯叟未嘗忤其意

堯佐端拱元年登進士第累擢知制誥翰林學士天聖

七年樞密副使改叅知政事明道二年罷景佑四年與
王隨同相次年諫官論政事錯謬以宰相非其人遂與
王隨同請罷竝除使相堯佐判定州康定元年以太子
太師致仕居鄭州四年卒贈司空兼侍中謚文惠後事
皆豫備自誌其墓曰有宋潁川生堯佐字希元號知餘
子壽年八十二不為天官一品不為賤使相納祿不為
辱三者粗可歸息於父母棲神之域矣有文集三十卷
又有朝陽編野廬編遣興策愚丘集子述古求古學古

道古博古修古履古游古襲古象古初堯佐為開封府
推官以言事貶通判潮州潮俗鄙陋始至為修宣聖廟
作韓吏部祠堂人始知學有張氏子年十六為其母浣
衣惡溪為鱷魚所噬堯佐慕韓吏部投文惡溪因捕獲
以文戮之於市為兩浙轉運副使杭州江堤舊以竹籠
石潮濤所嚙未幾輒壞堯佐議實薪土以易之或言其
不可而丁謂執政遂徙堯佐京西其後堤久不成遂用
薪土知滑州河決捲婦不能定堯佐乃鑿木如編齒置

於湍流隨水而下謂之木龍遂殺水勢而堤又護以長
堤郡人謂之陳公堤在樞府日太常博士陳詒知祥符
縣以法繩吏吏悉遁去章獻太后怒事下樞密院詒連
姻宰相呂夷簡有欲因詒中傷夷簡者堯佐以為罪詒
則姦人得計而能吏沮矣詒遂獲免堯佐工為二韻詩
人多傳之性儉約不事浮侈當未第時同父省華及伯
季訪華山陳搏搏謂之曰三子皆將相然中子伯季所
不逮也卒如其言

弟堯咨字嘉謨咸平三年登進士甲科累擢知制誥景德三年殿試進士與劉幾道於試卷中為密號貶鄆州團練副使大中祥符九年復知制誥遷集賢院又遷龍圖閣直學士知永興軍所為多不法上不欲窮治止罷學士徙鄧州復知制誥常為人所傾堯叟乞示以所犯使知上保全之意因詔切責之乃引謝久之復職仁宗即位擢知開封府除翰林學士龍圖學士換觀察使知天雄軍固辭不得已受之加畱後進武信軍節度使再

知天雄軍卒年六十五贈太尉謚康肅子敏古宗古昭
古榮古垂古本古臻古堯咨有文著治本十六篇諸宮
上下編善射性豪侈在永興置武庫建視草堂開三門
築甬道出入用刑慘刻數陵陝西轉運使樂黃目黃目
請徙以避之其事遂達於上

章得象字希言世居泉州高祖任僞閩建州刺史因家
浦城母夢登天得玉象而得象生既生父夢庭中積象
笏如山因名之曰得象咸平五年登進士第累擢知制

誥翰林學士加承旨景佑三年同知樞密院事寶元年與張士遜同相慶厯五年以使相判陳州封鄒國公徙河南府引疾守司空致仕卒年七十一贈太尉兼侍中謚文憲性簡重在翰林十二年怡然自得居相位八年親戚子弟皆抑而不進子澤之介之廷之脩之仁宗嘗謂得象曰先太后臨朝羣臣邪正朕皆默識之卿獨忠清無附麗故大用也

陳執中字昭譽父恕字仲言洪州人少為小吏俄折節

讀書王明知洪州褐衣請見劇談時務明歎曰奇士也
太平興國初登進士第擢至給事中淳化二年叅知政
事坐以上意語樊知古辨析上前因罷政自後屢遷至
尚書左丞集賢院學士景佑元年卒年五十九子淳執
中執古恕長於吏事在朝敢言端拱初為河北營田制
置使密奏曰戍卒皆惰游仰食縣官一旦使冬被甲兵
春執耒耜恐變生不測既得詔罷營田止葺堡壁而已
屢司金穀檢察甚峻常言出入之任所當慎者起支定

例人以為當時在三司頗傷苛碎知貢舉避嫌凡江南貢士皆被黜落又舉行貢舉非其人條被罪者皆怨憤起事親至孝居喪絕葷茹哀毀過禮以故得疾不任治劇執中以父任為正字屢進文論真宗稱善召至闕下帝屬疾大臣無敢及建儲執中上言太子天下本不可不早定明日上袖所製演要三篇示大臣徐曰更有一佳文字乃所陳建儲議因召見擢右正言坐公累奪正言出監岳永真三州酒稅茶務累擢天章閣待制龍圖

閣直學士寶元元年知樞密院康定元年罷慶厯四年
叅知政事五年與賈昌朝同相皇祐初以疾求罷進吏
部尚書觀文殿學士知陳州久之以使相判大名府五
年復相以咎小婢出外舍死御史孫抃列其八事劾奏
之翰林學士歐陽修亦論列於朝至和二年罷除使相
判亳州還上節鉞改右僕射封黃國公徙河南曹州過
京以疾賜告就第加司徒祁國公致仕卒年七十贈太師
兼侍中有司謚恭襄詔謚曰恭執中當國八年人莫干

以私四方問遺無及門者在中書不欲外聞差除每退朝即閉省東門又罷三司百司勾當公事及三司所舉場務官皇祐末貴妃薨上常詢之不能考正典禮以對遂至追黜再論罪之

晏殊字同叔撫州臨川人七歲善為文景德初李昉張知白安撫江南薦之召試詩賦進士出身後二日復試詩賦論自言賦題已常為之上喜其不欺為改題文成稱旨擢正字秘閣讀書丁父母憂皆特起復仁宗封昇

王為記室升儲為太子舍人累擢知制誥翰林學士天
聖三年樞密副使五年罷既而除御史中丞改資政殿
學士兼翰林侍讀學士除三司使復樞密副使未拜改
叅知政事章獻太后崩以禮部尚書罷知亳州陳州復
為御史中丞三司使康定初知樞密院事未幾除樞密
使慶歷二年加平章事三年與章得象同相四年諫官
孫甫蔡襄彈奏所撰李宸妃墓銘不言上宸妃所生及
役兵治產事除工部尚書知潁州應天府許州復觀文

殿學士知永興軍河南府以疾請歸京訪醫留侍經筵
提舉萬壽觀卒年六十五贈司空兼侍中謚元憲真宗
嘗謂輔臣曰殊少年孤立力學自奮加以沉謹京師賜
酺京官不預會同輩召出觀不答其弟穎亦能屬文朕
遣取所業且戒殊勿為改竄弟請潤色不之省亦不言
其故周慎如此信知其稟賦異也在三司時元昊叛陝
西用兵殊請罷監兵仍不以陣圖授諸將及募教弓箭
手又請出宮中無用之物以佐邊費由是悉罷他日之

領財利者還度支初為樞密副使從幸玉清昭應宮怒從者持笏後至擊折其齒緣是遂出性剛峻簡率如此雖少富貴奉養若寒士當世賢士大夫如范仲淹歐陽修孔道輔輩皆出其門其為文章瞻麗應用無窮尤工風雅才有餘思子居厚成裕知止明遠祇德幾道傳正女適富弼楊察有文集二百四十卷又有臨川集二州集二府集又取梁陳至唐人文章為一集既葬御篆其神道

碑云

劉云王介甫不得專臨川矣

杜衍字世昌越州人大中祥符元年登進士第累擢天章閣待制樞密直學士御史中丞龍圖閣學士康定元年同知樞密院事改副使出為河東宣撫使慶歷三年樞密使四年拜相兼樞密使五年罷明年願還印綬以太子少師致仕故相一上章得請以三少致仕皆非故事議者以為賈昌朝疾之故也謝事十餘年累遷至太子太師祁國公卒年八十贈司徒兼侍中謚文獻子沂衍臨終作遺疏千餘言其略云勿以久安忽邊防之戒勿以既

富輕國用之原又請早建儲副以安天下心衍清介舊
無居第既退方葺舍南都出入如平日無軒冕意好吟
詩晚喜草書在相位多裁抑僥倖衆所不悅御史劾奏
其壻蘇舜欽集妓樂進秦院祠神事又王益柔作傲歌
語涉指斥欲下御史按罪行謂羅織獄今起都下矣執
不可又諫官孫甫言丁度面求進用請屬吏行不為致
對范仲淹富弼出宣撫言者隨攻之上欲罷二人衍又
以為不可遂疑其朋黨出知兗州范仲淹常出行門

下後數爭事上前行無愠色仲淹益敬服焉

龐籍字醇之單州人大中祥符八年登進士第累擢天章閣待制龍圖閣直學士慶歷四年樞密副使皇祐三年拜相五年罷以使相觀文殿學士知并州徙青州請老以太子太保致仕卒年七十六贈司空兼侍中謚莊敏子元英元中元直初籍為大理寺丞預編天聖敕累擢殿中侍御史章獻太后崩籍下閣門取垂簾儀制盡燔之有欲造後苑珠玉奇巧物媚上者籍言螟螣為災

民憂轉徙復有西北夷狄之患苟非儉約何以濟用上
嘉納之為開封府判官尚美人遣內侍韓從禮稱教旨
免工人市籍者籍言於上上為杖從禮仍詔諸司自今
宮中傳命無得施行知延州自五龍川之敗戎落民居
焚燬幾盡戍兵十餘萬未有營壁籍按金明西北有渾
州水土平沃川尾有橋子谷即虜出入之隘道也命鈴
轄狄青將萬人築招安寨於谷旁募民耕墾得粟甚多
凡故地為虜所據者悉逐之築土城久之元昊遣牙校

齋其親信野利旺榮書求納款籍意其詐不受後數日果寇定川既而復以榮旺書來而元昊亦去僭號籍不敢答乃請於朝朝廷厭兵議招懷之使籍答書稱旺榮為太尉籍復請曰太尉天子三公使旺榮稱之則元昊不可得臣矣其書自稱寧令或謨寧令皆虜中官於義無嫌詔從之踰年又遣使來改名曰曩宵稱男不稱臣籍言名體未正不敢以聞其使求自至京師若天子不許則更歸議之籍言虜辭理寢順俟其使至仍遣使同

往申諭之卒用其策而元昊復臣及為樞密副使又請
併省官屬徙兵就食於是邊費十省七八其後又與中
書議汰冗兵八萬焉在相日儂智高叛或言狄青不可
專任上以問籍籍曰青起行伍若以文臣間之則號令
不專不如不遣也上然之及捷書至上謂籍曰非卿執
議豈得成功既而推恩二廣應舉者六百九十一人時
以為僭嘉祐中皇嗣未建上不豫籍密疏言之甚切
劉沆字冲之吉州永新人父素不仕以財雄鄉里曾祖

景洪事楊行密為江南牙將有彭玕者據州稱太保脅
景洪附湖南偽許之復以州歸行密遂不仕嘗謂人曰
我不從彭玕當活萬餘人後必有隆者因名所居山曰
後隆山山有唐牛僧孺讀書堂故基即其上築臺曰聰
明臺沆母夢牛相公來而生沆天聖八年登進士第累
擢知制誥龍圖閣學士皇佑三年叅知政事至和元年
拜相嘉佑元年罷知南京徙知陳州卒年六十六仁宗
作挽詩賜其家又篆其碑額曰思賢之碑沆倜儻任氣

所至有治聲決訟多中理時論比之張詠知衡州有大
姓尹氏為偽券以欺鄰人之孤訟久不得直沆至其孤
纔二十詰尹氏曰若券曾取證他鄰否其人當有存者
尹氏辭咄服刑而歸其田知潭州有草寇黃捉鬼鄧和
尚誘溪峒獠人擾湖湘北軍至多病死沆募土兵使保
地分賊稍困乃令提點刑獄楊畋等八路入討斬首萬
餘級遂頓兵開一路榜曰賊由此路出降敢殺者與擅
殺同於是降者三四萬人賊平召還而餘黨復叛殺裨

將降知鄂州其後權知開封府有張彥方受富人金偽為張貴妃母越國太夫人奏補助教敕沆抵彥方死不問越國及叅知政事包拯論沆緣貴妃進後追冊貴妃為后而沆為園陵使既葬賜妃閣金器百兩辭不受在相位疾言者屢加裁抑又舉行御史遷次之格滿二歲者與知州范師道趙抃歲滿求郡獨引敕出之中丞張昇等言沆挾私出御史沆乃言臺官將有不測之謀論辯不已遂罷知南京子瑾琢瑄

賈昌朝字子明真定人晉中書舍人緯之曾孫天禧元年獻頌召試賜同進士出身景佑元年初置崇政殿說書以授昌朝而天章閣置侍讀亦自昌朝始累擢知制誥龍圖閣直學士權知開封府御史中丞慶歷三年叅知政事四年樞密使五年拜相七年除使相判大名府王則平加檢校太師封安國公楊偕言賊發所部不當賞弗聽皇祐元年徙鄭州留以觀文殿大學士判都省又求補外除右僕射使侍中判鄭州辭僕射侍中改使

相二年母喪去位四年除故官召對經筵講易出判許州移大名嘉祐元年樞密使仍同平章事三年諫官御史言昌朝別為客位以待宦官又釋其矯制者罪雖無實罷為使侍中景靈宮使七年復判大名府英宗即位加左僕射鳳翔尹魏國公治平元年求還使侍中不許二年改觀文殿大學士判都省卒年六十八謚文元昌朝在經筵善講說仁宗有所質問皆記錄刪潤以進賜名邇英延議二閣記注錄太平興國寺災以易春秋進

戒因言可勿繕治以稱順天愛人之意西域僧以佛骨銅像獻請加賜遣還勿示外皆從之銓法縣令俸錢滿百二十千者乃注舉縣令人昌朝判銓以為如此則小縣終不得善令矣仍一等給俸劉平石元孫陷西虜或誣以降議收其族昌朝為中丞言事未可知乃不果收及在相位元孫自西夏歸議賜死昌朝獨曰自古將帥被執歸不死元孫得不死侍講林瑀以天子即位年月傳會易算推吉凶昌朝疏出之元昊反昌朝請減不急

費詔令與三司合議減百萬緡又言待夷狄六事時皆用之在大名河決商湖中書議歸之六塔昌朝力爭之不已其後河果不可塞振救瀕河水災之民全活甚衆中人劉恢往還河上言河決趙征村與上姓名嫌為不祥或謂昌朝使之以搖當國者昌朝博學善議論為一代名臣及大用不為正人所與而數有攻其結宮人宦官者有奏議文集各二十卷通紀八十卷本朝時令十二卷羣經音辨十卷

宋庠字公序安州人舉進士開封禮部皆第一人天聖元年賜進士及第與弟同有時名以詩賦為學者所宗謂之二宋庠初名郊李淑因對言於上曰郊交也姓與國號同而名交非所宜仁宗語之更焉累擢知制誥翰林學士寶元二年叅知政事出知揚州加資政殿學士慶歷五年復叅知政事八年樞密使皇祐元年與文彥博同相二年罷為觀文殿學士知河南府徙許州河陽嘉祐三年同平章事樞密使封莒國公五年罷以使相

判鄭州徙相州英宗即位移鎮加檢校太師鄭國公景靈宮使屢請老不許出判亳州其請不已乃以司空致仕卒年七十謚元憲上篆其碑額曰忠規德範之碑初制舉人與武舉雜試庠建言六科待天下異士宜設次具酒食禮之武舉人別試上從其請慶歷中仁宗召兩府資政殿親策以時事庠獨以為兩漢對策本延嵩穴草萊之人臣等備位大臣自視遇如賤士非所以尊朝廷乃請歸中書合議上奏從之後又手詔以時事詢兩

府與庠同推庠為對庠所至以靜鎮為治末年信愛幼子頗致物議性儉約不喜聲色讀書至老不倦初在西掖上欲以同樞密院故事無自知制誥除者乃召入翰林而用弟祁

祁字子京與兄庠同試吏部會諒陰止奏名祁為第一章獻太后云弟不可先其兄可擢庠第一而祁為第十人兄弟友愛甚篤仍同簽甲科初釋褐授復州軍事推官累擢修起居注次當知制誥而庠叅知政事乃除天

章閣待制庠罷除知制誥歷龍圖閣直學士翰林學士
庠復執政改龍圖閣直學士樞密使復翰林學士當張
貴妃制庠欲以告進問李淑淑曰第進之上意在冊禮
庠乃進告遂落職知許州未數日復侍讀學士又復龍
圖閣學士御史言其子與張彥方游出知亳州徙成德
軍加端明殿學士吏部侍郎知益州代還除三司使中
丞包拯言庠在益州多遊燕又其兄在政府乃以龍圖
閣學士知鄭州唐書成進工部尚書踰日為翰林學士

承旨除羣牧使卒年六十四贈刑部尚書將終親草遺表勸立皇嗣戒其子勿請謚勿乞遺恩勿為銘誌勿修佛事子定國彥國惠國輔國奉國順國亮國保國俊國廣國有文集一百卷廣樂記六十五卷唐書列傳一百五十卷修唐書十餘年雖外官亦以藁自隨非特文章有見於世其守邊議兵雖古之名將不能過也章疏之達於上者尤切世務卒不至大用時論惜之

隆平集卷五

欽定四庫全書

隆平集卷六

宋 曾鞏 撰

叅知政事

劉熙古字義淳睢陽人唐僕射仁軌十一代孫少通經史避祖諱不應進士舉後唐長興中以三傳賜第太祖領宋州節制熙古為節度判官及受禪累擢至叅知政事求退授戶部尚書致仕卒年七十四熙古好學明陰陽象緯書雖

通顯自奉養若寒素有歷代紀要五十卷行於世子蒙叟
竇偁字日章其先漁陽人父禹鈞在周為諫議大夫避
亂徙居河南禹鈞五子儀儼僖偁皆有文學中進士
第馮道嘗贈詩曰燕山竇十郎教子以義方靈椿一樹
老丹桂五枝芳世多誦之儀字可象晉天福中登進士
第在周為翰林及端明殿學士建隆初授禮部尚書翰
林學士時御史臺議欲以左右僕射為表首太常禮院以
東宮三師合為表首儀援典故以僕射合為表首者六

而謂三師無所據朝廷以儀之議為定五代喪亂之間
儀儼乃以文章學問自見於一時所謂豪傑之士也儼
字望之建隆初終於禮部侍郎翰林學士儼博物洽聞
通音律歷數宋興禮樂皆所裁定周世宗觀大水泗州
記以問儼儼以為天地有五德曰潤曰暎曰生曰成曰
動五德陰陽之使陰陽水火之本陰陽有常數水火有
常分奇耦相半盈虛有準謂之通正羨備過皇極無不
至謂之咎證陰之始主於淵獻水之行紀於九六凡千

七百二十有八歲為浩浩之會雖堯舜在上不能免者數也若夫辟狂臣專又昏不明苦雨數至不潤下乃政之所致非數也唐正元壬申之水是以德宗闇蔽篤於自疲陸贄盡忠而斥遠裴延齡專利而信用常雨之應夫豈虛生偁周廣順初登進士第其後同與賈琰在開封府晉王席下一日晉王燕射偁琰同預而琰贊美偁偁叱之曰賈氏子導諛豈不自媿坐客皆失色王亦不樂因罷燕尋白太祖出之太平興國四年駕幸魏郡召

傅至行在上方議北征傅抗疏極諫而止遂除樞密直
學士七年叅知政事入謝上曰汝何由至此傅曰陛下
不忘藩邸之舊爾上曰乃賞汝面折賈琰也未幾薨於
位時明日燕羣臣以傅喪故罷

李穆字孟雍開封人與弟肅皆中進士第累擢知制誥
中書舍人翰林學士太平興國八年叅知政事雍熙元
年薨於位年五十七贈工部尚書太祖曰非斯人不幸
乃朕之不幸也穆端謹自持言行無玷文學操履為上

所知太祖嘗遣使江南諭朝旨煜辭以疾穆曰朝與否
惟自處之朝廷繁富兵甲精銳恐不易當爾太祖謂其
所諭要切太平興國七年盧多遜竄朱崖穆以同門生
罷制誥責司封員外郎明年殿試預考較上見其容貌
謂曰憂畏所致耶穆流涕上為之動容詔盡復舊官命
知開封事豪右屏迹權幸不敢干以私是冬遂大用上
稱曰名臣也弟肅字恭叔仕至佐衛上將軍時以為有
知人之鑒

賈黃中字媯民滄州人唐相耽四世孫漢乾祐初年六歲中神童選十六進士甲第建隆間判太常禮院累擢知制誥翰林學士淳化二年叅知政事四年罷除禮部侍郎兼秘書監卒年五十六贈禮部尚書上因念翰林無良醫詔天下并大臣各薦能醫者黃中在翰林嘗召詢時政對曰職當書詔思不出位上益重其周慎知京朝官考課銓量平允掌吏部選品藻精當揀拔寒俊號為無私性端重守家法多知臺閣故事朝廷典禮資以

損益當時知名士皆出其門談論疊疊聽者忘倦特常
憂畏而執政循嘿時論少之太宗嘗召見其母因謂侍
臣曰朕念黃中終日憂畏必先其母老矣及黃中卒母
果猶無恙賜白金仍官其三子

王沔字楚望齊州人太平興國二年登進士第八年簽
書樞密院雍熙三年改副使端拱元年叅知政事淳化
元年罷卒贈工部尚書沔辯慧苛刻尚數多詐視士大
夫猶視吏卒惟以甘言悅人而進退皆非物望初與張

齊賢同在樞府不協及齊賢同叅知政事頗不自安因
王禹偁請中書本廳不得接見賓客許於政事堂同見
沔喜即奏行謝泌疏駁而止上知沔意因切責罷之沔
冒貨雖親舊未嘗毫末相及唯聲音清暢上親試舉人
多命近臣讀之所讀常得八九

蘇易簡字太簡梓州人父協仕至光祿寺丞易簡弱冠
舉進士甲科累擢知制誥翰林學士加承旨淳化四年
叅知政事與張洎不協為洎所攻至道元年張洎進而

易簡罷未幾卒年三十九贈禮部尚書易簡警悟初屬
文未工及掌誥命能自刻勵在翰林多振舉故事太宗
為飛白書院額曰玉堂及以詩賜以御書宋玉大言賦
易簡因擬賦以獻曰皇帝以白龍牋書大言賦賜玉堂
詞臣易簡御筆煌煌雄辭洋洋瓌瑋博達不可備詳詔
易簡陞殿躬指其理且歎宋玉之奇怪也因伏而奏曰
恨宋玉不得與陛下同時帝曰噫何代無人焉卿為朕
繼之易簡拜手稽首曰聖人興兮告成功登崑崙兮展

升中地為席兮饗祖宗天作籙兮調笙鏞日烏月兔耀
文明也參旗井鉞嚴武衛也執北斗兮奠玄酒也削西
華兮為石礪也飛雲涌震騰燿燿也剝鵬脂鯨代牲魚
也迅雷三發山神呼也流電三激燿火舉也禮再獻兮
淳風還君百拜兮三神歡四時一周兮萬八千年泰山
融兮滄海乾圓蓋穴兮方輿穿君王壽兮無窮焉時殿
上皆呼萬歲太宗覽而嘉之賜手詔褒寵易簡嗜酒上
嘗以詩戒之入直雖不敢飲在私第未嘗不醉子耆仕

至直集賢院耆子舜欽

舜欽字子美以父耆任太廟齋郎景祐元年登進士第
因范仲淹薦除集賢校理監進奏院用故紙錢祠神名
妓樂會賓客除名後二年得湖州長史卒年四十子泌
液激初杜衍愛其才以女妻之衍在相位以直道自任
言者因舜欽連及衍故衍遂罷政事舜欽慷慨有大志
好學工文章廢居蘇州買水石作滄浪亭時見其志於
歌詩又善書酣醉落筆人競收以為寶當時偉人如歐

陽修輩皆相友善亦數嘗上書論時事

張洎滁陽人李景開貢登進士第景徙豫章畱洎掌李煜記室累擢至清輝殿學士叅預機密煜歸朝太祖責之曰汝教李煜不降又草蠟丸詔召上江救兵洎對曰臣所為也大各吠非其主此特其一耳詞色不動釋之授太子中允太宗即位頗知其在江表讒毀善良潘佑之死與有力焉待詔尹熙古因對以為煜怒佑諫太直非洎譖也始晉擢歷中書舍人翰林學士與蘇易簡同在

北扉易簡被遇獨厚仍先大用洎惡之力排易簡遂代
叅知政事至道三年以疾求解職為刑部侍郎捧詔嗚
咽十餘日卒年六十四贈本曹尚書洎舊字師黯煜令
改為偕仁王師圍金陵與樞密使陳喬引符命勸勿降
又云苟有不虞當先死社稷及城陷喬獨死焉洎語煜
曰所以不死將有報也煜歸朝貧甚洎猶丐索之而怒
其所與之薄煜子仲瑀死亦不弔始諂事寇準準力推
挽至大用及上眷準稍衰乃面奏準退有誹謗準不辨

遂罷機務上有所著述必為文解釋其旨以苟悅

辛仲甫字之翰汾州人初從郭崇辟建隆初為右補闕
累擢至給事中雍熙三年叅知政事淳化二年罷以太
子少保致仕遷少傅卒贈太子太保子若冲若愚仲甫
器局沈厚數按詔獄多伸雪非辜嘗知彭州課種柳蔭
行路郡人謂之補闕柳奉使契丹北主問黨進何如人
仲甫曰國家異人間出黨進何足言也知益州政尚寬
簡民有去思及大用自守而已

李至字言幾真定人初為內臣李知審養子太平興國初登進士第甲科累擢知制誥翰林學士太平興國八年叅知政事以目疾五表求罷不許雍熙三年以禮部侍郎罷疾愈令復舊任懇辭遷吏部祕書監真宗升儲為左丞與李沆並兼太子賓客即位並叅知政事踰年除武勝軍節度使判西京卒年五十五贈侍中子惟允惟則初至執政太宗於禁中造閣藏四庫書數萬卷御書飛白題額製贊親書刻石召近臣縱觀駕臨幸至因

薦潘慎修舒雅杜鎬吳淑入充直館校理又請購逸書
命羣官校正時賜上尊酒大官珍膳令召館閣燕集賜
詩間奉新書奏御必便坐延見恩顧甚厚久之兼判國
子監又薦杜鎬崔倕佺輩充職西面請直講孫奭重校
五經孜孜忘倦或謂至既貴盡逐知審養子而取其所
積似與其辭位不受俸之行相反是豈或然

孫奭字宗古即疏孟

子者

李昌齡字天錫應天府人太平興國二年登進士第累

擢樞密直學士御史中丞至道二年叅知政事真宗即位為戶部侍郎坐交結中人貶許州行軍司馬昌齡嘗知廣州無廉譽及起廢御史屢彈其宿負除知梓州改河陽又改光州以秘書監致仕卒年六十二子虞卿

趙昌言字仲謨汾州人太平興國二年登進士第雍熙三年知天雄軍曹彬岐溝之敗昌言請誅之詔褒答除御史中丞駕幸金明池召與焉時河北用兵樞密副使張宏循嘿即除昌言諫議大夫樞密副使以宏代為中

丞坐胡旦翟馬周事責久之淳化四年叅知政事蜀王
小波李順之亂命昌言為招安使既行或言其無嗣鼻
折山根恐握兵難制即詔知鳳翔府蜀平改戶部侍郎
罷政事咸平三年復為御史中丞坐獄失實又貶既而
起知鄂孟天雄河南真定從封泰山卒年六十五贈吏
部尚書子慶嗣凡三蒞天雄初豪家有峙芻茭者時誘
姦人穴隄昌言廉知一日隄吏告急亟取豪家所積給
用自是遂絕其弊淳化中京城大水請出廐馬外牧或

云以馬備胡不可闕昌言謂塞下積水胡必不至從之
果如所料嘗薦李沆有公輔之量又以女妻王旦二人
皆賢相也昌言臨事果斷無所顧避雖屢擯斥不少抑
損惟對僚吏倨慢時論少之

王化基字永圖真定人太平興國二年登進士第累遷
至左拾遺抗疏自薦太宗曰化基自結人主誠可賞也
召試知制誥明年除御史中丞嘗夢物一奩啓皆小栢
樹俄有是命上澄清畧十事知樞密院柴禹錫僕受人

金叅知政事陳恕諭令及禹錫而禹錫實不知一日引
囚詣便殿上頗怒化基降殿令囚袒以見其簪掠且遍
曰豈有受此而隱情不言太宗益以為長者久之出知
杭州至道三年叅知政事咸平四年罷守工部尚書進
禮部卒年六十七贈左僕射化基不蔭補子弟其子舉
正舉元皆進士及第善筆札有文集三十卷嘗作南行
詩百韻好事多傳誦之知杭州書記張賀頗傲忽之太
宗知而面詢化基第薦其才語不及它居官俸多施及

親舊

王舉正字伯中幼重厚嗜學寡言化基以為類已尤器愛之以化基遺恩補授校書郎大中祥符八年登進士第仁宗即位累擢知制誥妻父陳堯佐為相換龍圖閣待制堯佐罷復知制誥又為翰林學士康定三年叅知政事御史臺舉其女壻李徽之為御史舉正以親嫌格不行徽之訟舉正內不能制其悍妻不可以謀國事慶歷三年罷為資政殿學士知許州皇祐元年除御史中

丞遷觀文殿學士禮部尚書兼翰林侍讀學士在經筵
二年以太子太傅致仕卒年七十贈太子太保諡文簡
有文集三十卷中書制書集十卷子誨說初舉正除執
政入謝上曰卿未嘗干朝廷以私故不次用卿時陝西
用兵呂夷簡以宰相判樞密院舉正曰判名太重不可
不避也乃改兼樞密使張堯佐授淮康軍節度使宣徽
使羣牧使景靈宮使舉正任中執法言堯佐庸人緣妃
家一日領四使賢士大夫無所勸不報因退朝留百官

班廷議上聞而遣中使諭止之尋罷堯佐宣徽景靈二使居半年復除宣徽使舉正家居七上疏論之又言河北朝廷之根本雄州河北之喉咽先朝用何承矩累年止遷刺史李元則幾二十年亦不過引進使今使用未盡得人而尅日待遷何以懋有功者又言在許州應天府六年更轉運使十六人數易如此豈能究宣朝廷惠澤乎除狄青樞密使力爭不能奪固請解言職上稱其風憲之體賜白金三百兩侍讀每及前代治亂之際必

再三以達諷諭之意

郭贇字仲儀開封人應進士為開封首薦太宗任京尹
得侍讀藩邸即位擢著作佐郎七年四遷至叅知政事
太平興國八年晨朝被酒責授祕書少監稍復積至禮
部尚書卒年七十六贈左僕射贇長者喜延譽後進宋
白趙昌言輩皆所薦也嘗對太宗曰臣受遇不次惟以
愚直上報上曰愚直何益曰猶勝姦邪爾晚節頗以治
生為物論所惜子昭度昭升昭用

溫仲舒字秉陽河南人太平興國三年登進士第嘗擯廢久之因言稱旨進用累擢諫議大夫淳化二年樞密副使改同知院四年罷至道二年叅知政事咸平初罷久之兼御史中丞以戶部尚書判昭文館卒年六十七贈左僕射仲舒有應用才屢與寇準同進謂之溫寇始廢黜呂蒙正當路力援進之及驟用反攻蒙正為士論所薄

陳彭年字永年建昌軍人幼好學母惟一子愛之禁其

夜誦書彭年置燈密室晝夜忘倦嘗師事徐鉉為文喜
嘲諷為宋白所惡白知貢舉屢加黜落雍熙三年始登
進士第累擢至翰林學士大中祥符九年叅知政事天
禧元年卒於位年五十七贈左僕射子佺期孫彥先大
中祥符間朝廷典禮無不叅預凡儀制沿革刑名之學
皆所常練雖談笑間屬辭不費當時制度雖前世所未
有必推引依據以成就之時政大小日有諮訪應答該
辯一無凝滯上之眷遇尤厚加以慎密外無知者資性

敏給博聞強記應舉時京城賜酺與同學出遊自東華門構思至闕前已成一賦其後雖出通顯奉養無異貧約時所得俸唯市書籍幼而篤學老亦不倦左右給使之人有彌年不知其姓名者所著文集百卷唐記四十卷

趙安仁字樂道河南人生而穎悟十三歲通經傳雍熙初登進士第累擢知制誥翰林學士景德三年叅知政事大中祥符五年罷知禮儀院兼宗正卿改御史中丞宗

正如故積官至尚書右丞卒年六十贈吏部尚書謚文
定子溫瑜良規承裕以遺恩各遷官安仁七子各授以
一經居宗族以雍睦稱雖家人未嘗見其喜愠操履純
正外晦內明畏慎謙退無事浮飾有所獻納退必焚燬
致身貴顯無改儉素尤練達典故近世衣冠人物制度
悉能記之在翰林從幸澶淵北戎請和令學士各進答
書上獨用安仁所撰亦以其能備記太祖朝書問規式
因獲預聞通貨之議北使至首命安仁接伴其覲見儀

制皆所裁定敏於酬酢仍切事機時論以為得體在宗
正請依唐故事置修玉牒官奏以劉筠楊億夏竦宋綬
為之又為仙源積慶圖皆統類精簡善議論好誨誘後
生學士大夫以清德宗之有同學宋元與者篤學而早
卒安仁力調其後裔

任中正字慶之曹州人雍熙初登進士第歷外官
翰林學士錢若水嘗薦其才累擢至樞密直學士知益
州并州開封府大中祥符九年樞密副使改同知院又

復為副使天禧四年叅知政事兼太子賓客仁宗即位
為兵部尚書與丁謂善謂敗力營救之謂竄降中正太
子賓客知鄆州復禮部尚書丁母憂哀毀過以疾卒年
六十六贈左僕射謚康懿中正以孝行稱於鄉黨事親
盡敬衣服簡質而飲食極於豐美子易弟中師

任中師字祖聖大中祥符二年登進士第累擢至右諫
議大夫加集賢院學士龍圖閣直學士樞密直學士任
布守河陽數上書論塞下事稱旨上欲用之呂夷簡素

知中師上前數稱中師才不在布下慶厯初遂並召為
樞密副使求補郡三年以禮部侍郎資政殿學士知永
興軍徙陳州請曹州踰年遂請老以太子少傅致仕卒
年七十七贈太子少保謚安惠初益州稅及薪芻蔬果
之屬中師知州奏盡蠲之性樂易家財素封雖處通顯
自奉甚約其踐歷與中正多同上數賜飛白書歸休於
里中建御書閣鄉人榮之子昱拱之

魯宗道字貫之亳州人少孤苦學嘗袖所為文謁戚綸

綸罷賞之咸平二年登進士第徧厯州縣天禧元年詔
兩省置諫官六員不兼他職考所言以為殿最宗道與
劉暭同選擢為正言仁宗升儲除戶部員外郎兼右諭
德踰年改正左諭德及即位遷戶部郎中龍圖閣直學
士兼侍讀詔與呂夷簡按視雷允恭擅移山陵皇堂事
還是年叅知政事天聖七年薨於位年六十四贈兵部
尚書謚肅簡時太常禮院言禮無廢朝特輟視朝一日
宗道質直遇事敢言不為勢所屈為諭德時真宗一日

遣中人詔之至其家俟之久方從酒家還使者曰即上
訝遲將何以對宗道曰第直言之及宗道見帝詢其所
之對曰有鄉人來貧乏楮盤就酒家飲之也帝善其無
隱而知其可大用初為秀州海鹽縣令疏治東南舊港
口導海水至邑下人以為利號魯公浦在諫垣時諫章
由閣門始得進而罕嘗賜對宗道請得面論而上奏通
進司自是為故事因言守宰與民至近而未見有區別
能否豈朝廷所以為民之意今除一知州補一縣令雖

甚庸暗有司無敢擯斥舉天下親民之官黷貨害政十
常二三介然自守孳孳政事殆未易得尚何裕民美化
之可冀乎昔漢宣帝除刺史守相必親見而考察之今
命知州通判知縣雖未暇親見宜令中書詢以言而察
其應對設以事而問其施為才與不才得以進退縣令
則命流內銓倣此施行庶幾得良守宰助宣聖化真宗
嘉納之宗道在選調久頗患銓格繁密而曲知銓吏之
姦弊判吏部流內銓多釐格之凡科條闕者悉揭示庶

下人以為便七年居政府裁抑僥倖不肯以名器私人
時樞密使曹利用有所憑恃肆為驕橫宗道屢折之於
上前凡貴戚近習莫不斂迹子有功有立有開

按親民之官天子親見考察法始於漢而宗道繼請
於宋至患銓格繁密釐革姦弊揭示科條慎重名器
皆古今要務魯公真經濟才也

隆平集卷六

欽定四庫全書

隆平集卷七

宋 曾鞏 撰

叅知政事

薛奎字宿藝絳州人父化光善命術奎生知其必至公
輔淳化中奎登進士第多歷外官向敏中薦其才累擢至
龍圖閣待制御史中丞龍圖閣學士三司使天聖七年叅
知政事章獻太后崩大臣皆罷獨留奎欲以為相而苦喘

疾數辭位除資政殿學士判都省卒年六十八贈兵部尚書
謚簡肅奎持身端重論不苟合善知人范仲淹明鎬麗籍在
下位時奎皆以公輔許之卒如其言天禧初自淮南轉運副
使疏真揚漕河廢三堰舟楫便之嘗館伴契丹使蕭從順從
順言漢使至契丹皆見太后今請入見奎曰皇太后垂簾聽
政雖本朝臣僚亦未嘗見也乃不敢請知益州蜀人以張詠
比之仁宗嘗謂輔臣曰臣之事君多見有始而無終者奎曰
保終始者豈獨臣下如唐開元勵精為治而天下晏然及其

既久放意荒侈以至大亂此不可不監也上深納之時邊臣
言伺知契丹將大入寇輔臣俱言擇將備邊之策奎獨
曰先帝與彼約合歲遺為厚彼必不敢輕背約願持重
已而邊報果妄太后謂太廟欲被黻冕奎固執不可及
太后崩上謂輔臣曰太后大漸且不能言數引衣示朕
殆意在黻冕乎奎曰然服之何以見先帝也卒以后服
斂

蔡齊字子思其先洛陽人曾祖為膠水令凡九年而卒

其子孫因家焉齊少孤好學李迪嘗見其所為文謂有大志大中祥符八年登進士第甲科真宗見其舉止端雅顧輔臣寇準等曰得人矣特詔金吾給駟從因以為例累擢知制誥翰林學士加侍讀龍圖閣學士御史中丞復為龍圖閣學士明道二年樞密副使景祐二年叅知政事與宰相呂夷簡論事不合四年罷出知穎州卒年五十二謚忠肅齊不自伐善知人龐籍楊偕劉隨段少連皆所薦也有子早卒以從子延慶為嗣其後有子

曰延嗣初齊為侍御史知雜河陽錢惟演請曲賜軍士
特支齊言賞罰者上之所操非臣下所當請天子新即
位惟演聯姻太后不宜私請一州以售已惠搖動衆心
上遂不許在翰林太后出閣中金繒修景德寺命為記
內侍羅崇勲使人隱謂齊曰趣為記當叅知政事矣齊
故遲之崇勲怒讒於太后遂出知河南府改密州太后
諭宰相取所傳記始上之章獻太后遺詔以楊太后同
議軍國事閣門趣班賀齊為中丞毅然名臺吏曰毋追

班齊乃白執政曰上奉太后十餘年今始親政豈宜以女后相繼耶事遂止在樞密交趾虐其部人有款宜州自歸者千數議者以為叛人不可納齊曰彼去暴而歸有德宜納之雖遣必不復還本部若散山谷當為後患不從後數年果為亂錢惟演諂附丁謂作樞密直學士題名記輒不列寇準於其間而碑刻云逆準不書齊言於上曰寇準社稷之臣忠義聞於天下豈可令姦黨厚誣上遂令磨去居政府邇臣言契丹祭天於幽州以兵

屯境上輔臣議備邊計齊以為契丹必不敢渝約既而邊奏果無警

盛度字公量餘杭人端拱初登進士第數上疏論邊事奉使陝西叅質漢唐故地繪為西域圖以獻累擢知制誥翰林學士寇準罷相度以嘗交結周懷政貶和州團練副使天聖初復翰林學士龍圖閣學士承旨兼侍讀學士景祐二年叅知政事四年知樞密院坐令開封府吏馮士元強取其鄰所賃官舍為知府鄭戩所發罷復

知揚州應天府以太子少傅致仕還京數日卒年七十
四贈太子太保謚文肅子山甫申甫崇甫初度因奏事
便殿真宗問其所上西域圖內出繒命工別繪度因言
前已圖漢所置酒泉張掖武威燉煌金城五郡比復究
尋五郡之東南自秦築長城西起臨洮東至遼碣延袤
萬里有郡有軍有守襟帶相屬烽火相望其形勢禦備
亦至矣唐始置節度使後又以宰相兼領用非其人有
河山之險而不能固有甲兵之利而不能禦豈不惜哉

今復繪其山川道路區聚壁壘為河西隴右圖願備聖
覽上稱其博度嘗坐開封獄失實謫監洪州稅上言請
復賢良方正科密詔撰策題馳驛以聞又請建四科以
取士且言經術之士若典刑備舉則政教流行請設博
通墳典達於教化科堯試臣以事不直以言語筆札求
人審官期於適用請設才識兼茂明於體用科今戒警
未除調邊勞戍必資良帥以集事功請設軍謀宏遠堪
任將帥科獄市之繁民命所繫若推按失實則枉情傷

生請設曉法律能按章覆科後亦取其才識兼茂明於體用科與賢良方正能直言極諫並行明道中詔度與御史中丞王隨及三司詳定在京并外三十一州軍舊禁解鹽地分聽商旅入錢算鹽度言通商有五利遂施行之度好學家居惟圖書滿前每歸未嘗釋手真宗嘗命與李宗諤楊億王曾李維舒雅任隨石中立同編通典文苑英華又嘗預注釋御集真宗祀汾陰仁宗在藩邸以度掌起居牋表及留守章奏封壽春郡王特詔令

撰謝恩表所著有愚谷集中書制集銀臺集翰林制集
極中集天禧三年郊恩赦文許舍人給事中諫議母封
郡太君而學士不預度官兵部郎中因請進封其母上
特從其請自是學士官未至諫議者皆得封其母焉度
多猜險僚友皆畏其傾不敢妄言語肌體豐大艱於拜
起有拜之者俯伏不能興或至詬罵其褊戾如此

韓億字宗魏其先真定人後徙開封之雍丘少力學咸
平五年登進士第王旦以女妻之久歷外官以旦在政

府避親及旦薨乃稍進用仁宗即位累擢龍圖閣待制
樞密直學士御史中丞景祐二年同樞密院事四年改
叅知政事因諫官言不當以子壻為羣牧判官寶元元
年罷知應天府加資政殿學士徙成德軍澶亳州遷尚
書右丞以太子太傅致仕卒年七十三贈太子太保謚
忠憲子綱綜絳繹維縝緯緬億性方重有守治家嚴肅
雖燕居未嘗見其惰容嘗奉詔監視向敏中諸子分財
產方丁謂用事陰遣所親諭億欲買向氏長安華嚴川

田億至向第面戒其諸子曰土田衣食之源不可鬻也
遂忤謂意謂出之定州曹瑋斥知萊州慮其或拒命乃
詔億馳往代收其兵欲緣以中億而瑋既奉詔謂亦不
能害二司更茶法歲課不登億承詔劾之由丞相而下
當坐失當之罰其不撓如此益州故事歲首官出米六
萬石或五六倍之以濟貧民億知州當歲儉乃數倍賑
之又疏江流溉民田數千頃至今以為利初通判陳州
河決屬邑億集瀕河丁夫就伐薪茭親督築不賦於民

而河患平知洋州有富民李甲喪兄而迫嫁其嫂又誣從子為佗姓而并其資產嫂訟之十餘歲吏受賂不得直億按舊牘獨未嘗證以乳醫億密致乳醫以驗決衆皆誣服在樞府元昊歲遣人至京師出入民間無他禁億請為除館舍以優待遠人仍官為主其貿易實欲防之也詔從之又言天下承平已久武備不戒請二府各舉才任將帥者數人稍試用之唃廝囉與元昊相攻已而來獻捷朝廷議寵廝囉以節制億曰二虜皆藩臣今不

能諭令解仇又因捷而賞之豈綏御四夷之道當如是耶固執不可遂罷又言武臣宜知兵書而法在所禁請纂其要畧以頒焉於是上自集神武祕畧以賜邊臣其書遂徧天下

王穀字總之趙州人大中祥符元年登進士第除婺州觀察推官代還真宗見而異之特轉著作佐郎先朝幕職官到闕例皆得見故有是命累擢至天章閣待制樞密直學士景祐四年同知樞密院事康定元年罷知河

南府卒年六十四上輟朝一日贈戶部尚書謚文穆子政路初醴館於王化基之門樞密副使宋湜見之妻以女宋氏親族或侮易之化基曰後三十年醴當貴矣卒如其言醴為三司鹽鐵副使時待制馬季良建言京師賈人常以賤價售京師茶鹽交引請官置務收市季良方挾章獻太后姻家有司莫敢忤其意醴獨執不可曰與民競利有傷國體它日仁宗見而諭之曰官市交引賴卿力言罷之甚善後以樞密直學士知益州戊卒有

夜焚營脅軍校為亂者醜潛遣兵環其營下令曰不亂者斂手出門無所問於是衆皆出命軍校指亂卒得十餘人戮焉及旦郡人不知也為政有大體不事苛察蜀人愛之在樞府屬西師不利議籍鄉兵久而不能決緣是有河南之命

宋綬字公垂趙州人幼聰警額有異相其外祖楊徽之器愛之徽之無子盡付以家所藏書以徽之遺恩授太常寺太祝年方十五召試中書真宗奇其文特遷大理

評事聽於祕閣讀書同校勘天下圖經久之復詔試學士院除集賢校理與父臯同在館閣每賜書必得二本世以為榮累擢知制誥仁宗即位擢直學士院天聖三年為翰林學士明年兼侍讀改龍圖閣學士出知應天府召還欲大用為宰相張士遜所抑復翰林學士兼侍讀龍圖閣學士加端明殿學士端明殿後唐初置學士馮道趙鳳首當其任太平興國中改為文明殿學士以授李昉未幾殿災重建改曰文德遂不復置學士至是

又置端明殿學士以寵綬綬辭免龍圖及士遜罷相明
道二年綬遂叅知政事景祐四年罷為尚書左丞資政
殿學士畱侍經筵明年加大學士知河南府康定元年知
樞密院改叅知政事薨於位年五十贈司徒兼侍中謚
宣憲子敏求敏修大中祥符初封禪覃慶上先賜綬同
進士出身翌日遂由大理評事遷本司丞後苑賞花羣
臣皆賦詩命綬與晏殊同為之序祀汾陰綬與錢易陳
越劉筠所過採集地志風物故實每舍上之以備詢覽

仁宗即位章獻太后命綬擇前代文字可以贊孝養補政治者以上遂錄唐謝偃惟皇戒德賦孝經論語節要唐太宗所撰帝範二卷開元臣僚所獻聖典三卷君臣正理論三卷上之太后稱制既久上未嘗獨對羣臣綬言唐開元中睿宗為太上皇五日一受朝處分軍國重務及三品以上除授決重刑明皇日聽朝除授三品以下決徒刑請令中書樞密院約先天制度非軍國大事及大除拜皆前殿取旨臣僚亦只前殿對繇是忤太后

意而有應天之命太后崩詔綬定章獻明肅章懿二太后祔廟禮綬援春秋考仲子之宮唐儀坤故事請別立章懿太后廟建名奉慈以安神主上從其議綬又言帝王之御臣下在乎總握威柄賞罰二者必自天子出一紀以來政出簾簿之間今陛下躬親萬務聽斷有祖宗英風天下延頸跂踵渴見聖政若非懲奸革弊無以新四方耳目而政刑號令未見勝於垂簾之日豈非三事大臣未能盡輔佐之道耶頃者除授恩澤多所希望

而因緣邪倖者邀取升擢議者皆以為恩出太后而不
由陛下自親政以來恩賞雖行議者又云悉出大臣盖
大臣公為朋黨罔冒天聰朋黨相結其害實甚或窺測
上旨密令陳奏或附會已意以進退人大臣市恩以招
權小人趨利以售進此風浸長有蠹邦政太宗嘗云國
家若無外憂必有內患外憂不過邊事皆可豫防惟姦
邪無狀若為內患深可懼也真宗亦云唐朝朋黨尤盛
漸不可制以至帝室衰弱願陛下思祖宗之訓念王業

艱難整頓紀綱正在今日上大感悟章惠太后營王中
正舊第為道觀諫官御史皆言近詔罷修寺觀而復有
此興造是詔令數更也上曰此太后自出奩中物耳言
者豈非邀名乎綬因曰是豈知太后所為但見忽興土
木違近詔爾疑似之事人猶奏論設少決周防雖臺諫
官不言四方亦自傳布為聖政之累太祖嘗謂太宗受
人諫疏直抵其非曾不為耻豈若自不為之而使人無
言望陛下深監皇祖之言嘗防外廷之議已出詔令且

要遵守無令喋喋之人自取名譽也綬又言自古守成之君必兢兢抑畏不忘顧省人心逸於久安患害生於所忽故立防於無事之際銷變於未萌之前若事至而後應不亦殆歟此固聖心所詳究臣猶願飭勵羣司交修庶職勿以治平自怠勿以纖譽不慎則可以保至尊而享洪業矣臣又切惟御下之道有三臨事尚乎守當幾貴乎斷兆謀先乎密守則不可移斷則不可惑密則不可干是三者治亂安危之所繫願陛下欽之念之至

若朝務清暇深居閒燕亦願陛下愛養聖躬節宣所欲
夫四時聲味所以調適六氣乃克和平自然擁百靈之
休享無疆之福豈不美哉初尚美人出宮上召綬面草
詔云當求德閼以稱坤儀既而聞左右以茶商陳氏女
入宮綬因間見曰陛下乃欲以卑賤者正位宮中不亦
與前日詔語戾乎及樞密使王曾入對上首詢之曾深
以為不可上曰宋綬亦如此言時宰相呂夷簡屢論列
上前卒罷之修郊祀綬嘗攝太僕卿陪玉輅顧問儀物

典故占對辯給因撰鹵簿圖以進綬資性孝謹清介寡
言經史百家莫不通貫朝廷有大議論皆所裁定於前
世文章必深考其得失而時之作者無所臧否集外祖
楊徽之詩刻石嘉州明月湖上家藏書萬卷皆手自校
正楊億嘗稱其文淳麗尤善賦詠自以為不及也綬之
筆札精妙上嘗取所書千字文及其家之墨迹藏禁中
所著有七集始綬疾不視事母問之必曰小瘳矣又通
賓客候問若且安以舒母憂然後事俱已詳處雖家人

不知也

李若谷字子淵徐州人少孤遊洛下因葬其考妣於緱氏而占籍焉咸平元年登進士第多歷外官累擢至諫議大夫集賢院學士龍圖閣直學士樞密直學士龍圖閣學士寶元元年叅知政事康定元年以耳疾辭位罷為資政殿學士明年以太子少傅致仕卒年八十以子淑在近侍優贈太子太傅天聖初若谷奉使契丹時章獻太后同聽政奉使者辭於庭下例升殿受旨若谷辭

已即趨出太后怒遂不遣荆南駐泊都監王夢正恃太
后姻家多不法若谷知府屢繩之監司阿蒙正奏徙若
谷潭州州有盜阻洞庭之險劫舟殺人投尸湖中前此
捕獲多減死配隸它郡久復逸歸為患滋甚若谷至潛
使人擒以屬吏條前後罪狀磔於市湖中之盜遂息知
延州夏人遣使來前守多延之堂上若谷獨廡下飲食
之安豐芍陂孫叔敖所創為南北渠溉田萬頃餘陂因
旱歲民多侵耕其間雨集將盈則盜決之陂涸失灌溉

之利者甚衆若谷知壽州陂決獨調瀕陂之民使之畚
築自是無盜決者并州自昔未有學舍若谷知州始建
學於文宣王廟州多降胡間常為盜若谷命集聚犯者
以三人為保有犯則并坐悛者則久而釋之在政府嘗
言近歲風俗澆薄駕朋黨之說以汙善良君子小人各
有氣類今一槩以朋黨名之忠臣恐懼臣亦無以立朝
矣上善其言為下詔做諭焉又言轉運使提點刑獄失
按所部官受贓類降差遣且監司所部甚廣巡按不過

留三日蓋未能徧察也苟州郡察發一賊吏先聞朝廷則監司不可勝黜自是詔轉運使提點刑獄再不覺察部內官受贓則降黜之若谷質厚長於治民所至郡邑去多見思一子淑字獻臣若谷通判亳州真宗朝謁太清宮淑年十三獻文行在上命賦朝謁太清宮詩稱旨賜童子出身授試校書郎天禧三年宰相寇準薦之除館閣校勘準注釋御集表為檢閱官天聖五年召試賜進士及第箋注御製三寶贊章獻皇太后發願文擢

史館修撰上時政十議曰國體曰災旱曰言事曰大臣
曰擇官曰貢舉曰科選曰閱武曰時令曰入閣其議國
體曰今災沴既頻賦入有限用度不足恩賞或濫吏員
滋多甄別殊少近臣暫出外若欲自留有固辭而罷者
進不滿望或不即拜有中路而易者願陛下號令一出
要在必當官職一授勿復再改至於國用未足濫官未
澄冗兵疲馬橫賞之類願命近臣知治體者準三朝出
入之數而撙節之議災旱曰頻歲以來亢陽為孽民多艱

阨歲不順成洪範曰僭恒暘若謂爵賞僭差號令迭改
今間遣使傳推存救之澤農服田畝無國家贍養之理
臣願陛下修人事以應天變不然徒匱國力未足以弭
民災也議言事曰先朝有劉驥者輕為奏疏先帝語左
右曰此人言多捭闔期在必行而近偽亂真詞旨易辨
驥常枉法受賂古人察言觀行正為此也願陛下於進
對之際防邪僻之人議大臣曰今歲兩府遷易頗頻其
於政體似傷簡靜太祖初定天下用周朝三相六年始

以趙普代之凡十年始代以薛居正沈倫太宗嗣位惟
盧多遜以罪去而復用趙普是後十八年中雖三四易
相然所用者李昉宋琪呂蒙正張齊賢呂端而已當是
時進者盡忠退者修省蓋進退皆出睿斷也真宗景德
已前三命相惟張齊賢李沆向敏中呂蒙正畢士安寇
準六人其後任王旦十二年向敏中再相亦十年此二
人在位之日非無疑似之嫌誠信任無間而不重以權
故也蓋權太重則難以久居言易入則得以譖愬真宗

嘗謂宰臣曰今四方無虞與卿等慎守祖宗經制最為急務此委相之大體也議擇官曰太平興國初文武朝官班簿纔二百人咸平初已四百人天聖元年遂踰千人去歲覃恩以臣料之又軼天聖之數矣先朝嘗諭審官流內銓主判若灼有能績為衆所稱者密以名聞當特旨升擢願陛下引對之際一如先朝故事行之其老疾懦弱間以退黜庶有所懲勸矣議貢舉曰皇朝開寶以前歲取進士不過三十人經學不過五十人自克復

偽國吏員益衆始有廷試廣收人之制願陛下約今歲吏部闕官之數為來年入等之準議科遷曰吏部故事選人格限未至能試判三節謂之拔萃止用疑案古義觀其能否詞美者優以授職此有司銓品之式今常調選人判超循資是其比也陛下親御軒陛審覈課試非其稱已願罷此科又禮部茂才異等求出類之俊頗聞鄉薦不獲始來應舉望更為嚴制以革倖冒議閱武曰開寶通禮有四時講武儀國初疆候未平多親閱試按

礮角射太平興國間築臺楊村備大閱之禮咸平中闢
場東武原發卒會射其後再幸飛山教場躬親訓練今
兵革不試三十年矣士不聞鉦鼓之聲人不識行伍之
列願陛下按通禮厲兵講事而躬閱之議時令曰開元
定禮有明堂及太極殿五時讀令之儀冠服佩玉悉從
方色月令不順則五沴應之近歲氣序繆戾水旱不節
天應以異固當變而修正願陛下申命有司以氣至之
日集百官讀時令於天安殿至尊升座近臣伏聽上下

交倣以凝庶績議入閣曰唐寶曆之後常以月朔御紫宸行入閣之禮後雖五代猶或講求施及聖朝太祖五行其禮多御崇元殿備殿中金吾諸仗設待制復轉對官崇元即今天安殿也乾德之後改御大明殿即今集英殿也太宗三行其禮別定新制就文德殿廷增設黃麾仗真宗亦三行之其禮之廢亦踰一紀願因盛時遵復其制景祐初知制誥自是五除翰林學士兩以人言不拜而三授端明殿學士侍讀龍圖學士亦皆再兼初

知鄭州作周陵詩三章刻石國子博士陳求古以舊怨
訟其譏訕朝廷乃徙應天府其後包拯吳奎言其嘗請侍
養父而不及其母中丞張昇繼論奏之出知河中府感風眩
而卒年五十八贈尚書右丞淑聰悟博學詳練典故預
修國朝會要三朝訓鑒圖閣門儀制康定行軍賞罰格
又獻繫訓二篇所著有書殿集二十卷穎臯集五卷內
制集三卷祭範一卷平棘集邯鄲集各十卷別集并筆
語各十五卷子壽明復圭德蜀

鼂宗慤字世良其先澶州人父迴太子少傅致仕宗慤以蔭補校書郎屢獻所為歌頌大中祥符中召試舍人院賜進士及第又召試除校勘校理累擢知制誥入翰林為學士兼龍圖直學士康定元年叅知政事慶厯二年以疾免除給事中資政殿學士卒年五十八贈工部尚書謚文莊子仲蔚宗慤有祠學當制頗愜人望事父母至孝而真篤於故舊任子恩皆先其族人在政府朝廷以金飾胡床及金汲器賜喃厮囉宗慤言昔仲叔於

奚辭邑而請繁纓孔子曰不如多與之邑繁纓諸侯之
馬飾猶不可輕與况乘輿之器耶

隆平集卷七